



8. Oktober 2019

UKA 2019/59-128-134

Aqqalu C.Jerimiassen

Imm. 59

**Cannabisoliat CBD-mik (cannabidiolimik) imallit aamma annerpaamik 0,2 % THC-mik (tetrahydrocannabinolimik) imallit unioqquitsinertaqanngitsumik pisiarineqarsinnaanngornissaannut nioqquqtigineqarsinnaanngornissaannut kiisalu eqqunneqarsinnaanngornissaannut Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Justus Hansen, Demokraatit)

Imm. 134

**Annerpaamik 0,2 procentimik THC-mik akulinnik cannabisimik nioqquтиssiat (tassani cannabisolia aamma eqqarsaatigalugu) inerteqputajunnaarsinnissaannik Naalakkersuisut suliniuteqaqqullugit Inatsisartut aalajangiiffigisassaattut siunnersuut.**

(Inatsisartunut ilaasortaq Peter Olsen, Inuit Ataqatigiit)

Imm. 128

**Danskit misileraanerattut ittumik nakorsat ataasiakkaat immikkut akuersissummik piniaqqaaratik nakorsaatitut akuerisaanngitsumik cannabisimik nakorsaasiillutik nakorsaanissamik periarfissaqarlersillugit misileraanermik aallartitsinissamik Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Peter Olsen, Inuit Ataqatigiit)

Nakorsaatit pillugit ilisimatusartusartut Canadami, University of Saskatchewan, meeqqat arfineq-marluk epilepsimik (tassa noqartarnermik) nappaateqartut qanimit misileraavigisimavaat, uppernarsaatissaqarluartumillu arfineq-marluk akornganni annikinnerulluinnartumik noqartarnerannut ersiuteqalersimavoq, taakkunani lu pingasut noqassaavissimallutik. 07.Juli 2019 allaaserisami nassaarineqarsinnaavoq paasisaqluarnerujumalluni<sup>1</sup>.

Apeqput tullinnguuttoq taava tassaalerpoq, sooq taava qimarratigiuarparput? Ilisimatusarnikkut takussutissaqartinnejaleraluttuinnarpoq, inoqateqarpugut sakkortuunik anniaatilinnik ullormut iisartakkannik itumak ulikkaarlugu tuniorarneqartartunik sulili anniartunik.

<sup>1</sup> <https://themindunleashed.com/2019/07/cannabis-oil-reduce-eliminate-seizures-kids.html>



Nunarsuarmioqataaleriartorpugut, tamassumallu malitsigisaanik piviusoq sumiuttoq takungaluttuinnartillugu qimarratigiinnarsinnaanngilarput. Paquminartut asu tassa maanna pigisarpassuagut piiarniartigit piffiit nutaat atulerlugin inuiaqatigiittut. Naliginnaavallaaleqaarmi ullutsinni cannabis eqqartorneqartillugu soorlulusooq ikiaroorajuttutut atornerluisutullu naqissusiiniartarneq, ila taanna eqqarsartariaaseq ullutsinni qimanneqatsiarlitorimi. Ilami napparsimavimmik tradolan-inik tunineqarsimatilluta apeqquserneq ajorparput sunik akoqarnera, tassami ikiarsinarsinnaaneri uerinartortaqarnerilu puuni allaqqasarmat.

Maanna ukioq ataaseq qaangiussimalerpoq nunami sanilitsinni Canadami cannabis tamakkiisumik inerteqquttaajunnaartinneqarmat, suliaq takisimangaluaqisoq unammillernartorpassuarnillu malitseqarsimalluni, maanna anngiortumik eqqussuinerujussuit assigiinngitsut ajornartorsutiissariunnaarpaat. Taamaattumillu maanngaaq eqqarsaasersuutigisariaqarparput nunatsinni qanoruna illilita nuna sanilerput paasisassarsiorfiginiaripput pitsaaqutaanik ajoqutaanillu. Kangimut kimmullu qiviartutta nunat saniligut qaqortoq qernertorlu assersuunneqarsinnaagunarput, Canada qiviaraanni sorpassuartigut ammanerusumik politikkeqarlutik ingerlatsinerat allaanerusumik inerneqartoq Islandimi killilersuinipiluunerujussuit muminganik ikiarorniutinik sakkortoorsuarnik, soorlu cocaine, amfetamininik atuiartupiluulernermik ajoraluaqisumik malunnaatilissuarmik ukiuni kingullerni kinguneqarput, sulilu qaffaraluttuinnartutut sikkqararlutik. Soorlulusoq angumerisimanngisakka pointit nunatsinni atuunnerisa nalaani taamak pisoqarsimasoq.

Nunani issittumiitilluta isertuunneqarsinnaavallaartunangilaq gigtertorpapiluunerujussuaqaratta, ilaatigut issimiinnaagunangikkaluqaq inuulluataarnerulli aqqani anniaatinittarnernik malitseqartunik.

Gigtertarpassuagut naluneqanngitsutut naalliuttaqaat, kalaallillumi oqartarnerattut avatiminnik aatsaat "silasseriuleraangamik" anniarneri ingatsikkaluttuinnartarlutik.

Tassuunakkut cannabis sativa-p uuliataa atorluarneqarsinnaasuovoq pitsassuaq, aammattaarlumi apeqqutaalluni anniaat qanoq annertutiginera cannabis sativa imaluunniit indica atorneqassaneri siunissami immikkuutaarlugit suliarineqarsinnaasunut ilanngussinnaavoq, soorluttaarmi taaneqartoq imm.134-imi nakorsat misileraalersinnaanerat akuersissummik toqqaannaq peqqaanngikkaluarluni.

Noqartarnermik epilepsimik eqqugaaqqasortagut ulluinnarni inuuniarnerminni ilinniaqqinnissamut pilergisaminnut eqqugaaratarsinnaasarpus, taannaannaanngitsumillu, noqarujussuartarnermik peqartut nalaatsornikkut noqariasaarnermi toqumik kinguneqarsinnaasarmat arajutsineqartillugit. Namminermi tamanna misiginikuusanni ilaavoq alianaraluaqisumik, Qaqortumi 2010-imi najungaqarlunga ikinngutigilluangara noqarsimalluni arajutsineqarluni kingorna toqusimasoq nanineqarmat.

Asasarpassuaqarpugut nunatsinni nappaassuarmik kræftimik eqqungaankkut annaasimasatsinnik, nukittuniarnartaqaarlu nalaataqarsimatilluni takusinnaallugu nunatta avataaneersuni nutaarsiassani nappaassuarmik eqqugaasimasoq aniguisimasoq cannabisimik nakorsartarnermigut, eqqarsartuartarluni "soormitaavaana ila nunatsinni taama paquminartigisoq iluaqtissarput?", allanguinissamik eqqarsarsinnaassuseq suliassani ilaavoq ima ittuni aaliangeeqatigiissatilluta maani inersuarmi.



Nakorsanit nakorsaatinillu imaaliallaannaq ikiorneqarsinnaaneq ajorpugut nanertisimanermik uvvernermillu eqqungaasimatilluta. Ingasammi avannaani kaperlattartumi taarsiornerup malitsigisaanik nanertisimanerit annertuut piusinnaasarput, uanilu qiviaqqeriaraanni imm.134 nakorsanik toqqaannaq tunineqarsinnaanermut medicinske cannabisimik pissarsinikkut (malungalugu) immaqa qaangilertornerusinnaaneq pisinnaammatt.

Tamannalu pillugu maanna Atassummiik oqaatigerusupparput, ukiorpassuarni innuttaasoqatitsinnik pinerluttungortitsiuarsimanerput anigussagutsigu, piffissanngulinnginnerpa cannabis ammaalluinnariartuaalernissaanut aqutissanik iluaquataasinnaasunik ajoquataasinnaasunillu naalakkersuisut suliaqarlutik misissuitlernissaanik suliakkeriinngikkutigit? Qaa maanna periarfissaqarnerput atorlugu uku qulequttat pingasut katigullugit suliaasut nukittorsarsimarpasinnerisa malitsigisaanik anguniangaqaqatigiinniarta.

Erseqqissaassutigilarali, uani ikiaroornartoq hash pineqanngimmat.

Taamak Atassummiik oqaaseqarluta imm.59, 128, 134 tamakkiisumik toqqaannartumik taperserpagut.